



یومیات

مسیز أحلام مستر كابوس

الكتاب : مسيز احلام مستر كابوس

المؤلف : انجي أحمد محمد فراج

تصميم الغلاف : محمد مجدي

مراجعة لغوية: إسلام علي

رقم الإيداع : ٢٠١٥\٢٦٥٣٠

الترقيم الدولي : ٩٧٨-٩٧٧-٦٤٩٥-٣٦-٤

\*\*\*

دار الميدان للنشر و التوزيع

جمهورية مصر العربية

هاتف 0552311408 / 01224245429

Website: [www.daralmidan.com](http://www.daralmidan.com)

E-mail: [almidan@daralmidan.com](mailto:almidan@daralmidan.com)



جميع الحقوق محفوظة للمؤلف، و أي اقتباس أو اعادة طبع  
أو نشر دون أخذ موافقة كتابية من دار الميدان فإن ذلك  
يعرض صاحبه للمساءلة القانونية.

يوميات

مسيّز أحلام مستر كابوس

اجتماعية خيالية ساخرة

د. أنجي فراج

الكتاب

الاهداء

اهداء لكل اثنين متجاوزين أو يفكروا يتجاوزوا أو مترددين  
يتجاوزوا أو اجهزوا ومستنين يتجاوزوا

انجوانا

الكتاب

## المقدمة

تعليمات يجب أخذها بعين الاعتبار قبل القراءة، وزى منت شايف بالفونط العريض:

أولاً:

أبطالنا عايشين في حالهم لو سمحت، وماشين جوة الحيط. أي حد يحب إنه يفتي يقول ده المقصود بيه فلان أو علان، ياخذها من قصيرها وما يقرأش بقية الصفحات.

ثانياً:

أبطالنا من وحي خيال المؤلف، وعايشين جوة خيال أي قارئ، مجرد ترجمة خيالك مش معناها أي حاجة مضرة، خالص بالعكس، دي ظاهرة صحية إننا ننفس مع بعض بدل ما انت عمال تتنفس لوحك لما حتطق!

ثالثاً:

أبطالنا كلهم أبطال مش كومبارس، وتأكد إن الكومبارس بس هي الفكرة السلبية اللي عايشة جواك ولازم إنك تتخلص منها قبل ما تعيش مع أبطالنا؛ عشان ماياخدوش على خاطرهم منك.

رابعاً:

لغة أبطالنا غالباً حتفهمها؛ عشان هي لغة تخاطر وانت أستاذ فيها، بالظبط كده زي لما المودام بتزغورك من تحت لتحت لما واحدة حلوة تعدي من قدامك وتبقى عينيك حتكالها أكل وعامل نفسك مش فاهم هي المودام مالها قارشة ملحكتك كده ليه، والمصيبة إنك فاكّر إن محدش واخد باله، مع إننا كلنا واخدين بالنا مش هي بس. ربنا يقدرنا ونساعد في استقرار أسرتك.

عامّة ده مش موضوعنا.. دعوا الخلق للخالق.. ونرجع تاني نكمل باقي التعليمات.....

خامساً:

افتكر بس وانت بتقلب في الصفحات إننا مش بنتكلم عليك انت بالتحديد، وصدقني حتفهم على طول.

سادساً:

لو فكرت إنك تقرأ الكتاب ده لوحدهك حتزور.. لازم انت والمودام، ويا ريت حماتك كمان يكون أفضل؛ عشان الفائدة تعم، وألف ألف مبروك.



سابعاً:

فشل حياتك معناه فشلنا كلنا، ولازم تعرف إننا كلنا لازم نتخلص من الفشل مع بعض، حتى إن حسيت إن ده نوع من الحشرية مننا، فاعذرنا معلش.

استعد عشان الستارة قربت تتفتح

\*\*\*\*\*

الكتاب

[مسر أحلام مستر كابوس]

أشتاتاً أشتوت!

الكتاب

الألفا أحلام الطويل

الكتاب

كان ياما كان من أي زمان، وفي أي مكان، مدام أحلام موجودة  
من زمان هي والأستاذ كابوس زوجها المصون.. قصة حب من  
القصص اللي كلنا نعرفها، فيها كفاح ومحاولات انتحار و"بجبه  
يا بابا" وووووووو -----

لحد لما الفاس وقعت في الراس، وطبعا هي ماكانتش أول راس  
ولا آخر راس، وأكيد الفاس كانت معتبرة.

مدام أحلام اتعمل لها فرح مش زي أي فرح.. فرح معتبر على  
السطوح أوبن إير، حضره كل الجيران والأهل والأصحاب  
وزمايلها في الشغل. وطبعا الست الوالدة الحاجة أوهام رقت  
بنتها تمام ساعة الفرحة؛ أصلها مقتنعة تماما إن بنتها معمولها  
عمل ومدفون تحت السطوح، ومحسودة ومعيونة ومنحوسة  
وموكوسة، وإن أغلب صاحباتها بيحسدوها على حالة اللامبالاة  
اللي عندها؛ لأنها رغم كل المصايب اللي مرت بيها فضلت  
متأكدة إنها حتتجوز، وفعلًا طلع بختها مَجُوع واتجوزت  
الموكوس ابن الجيران كابوس اللي كان بيسبلها في كل خارجة  
وداخلة أكنه واقف في قرافة وشايل في إيده قرص يقرص فيها  
لغاية لما تسبيلة على قرصاية طلعت أوت من رجله وعينه  
ونشنت في دماغ أحلام فعملها صداع انتهى بزغاريد.

نيجي لصاحباتها.. لسة في مرحلة ما قبل الكعبلة أو ما بعد  
الكعبلة، والفوقان والدوخان والوقوع في المستخبي، طلاق،  
انفصال، انتحار، شلل أطفال، شلل رباعي، شلل نصفي، زهايمر  
مبكر.

يعني ما علينا دعوا الخلق للخالق.

نرجع لأحلام.. اتجوزت، وبعد شهر واحد من البصل فاقت على كابوس اللي هو نفسه اسم جوزها كابوس، وقررت إنها لازم تلاقي حل، وبالصدفة عرفت إن فيه مكان لتلقي الشكاوى والأعطال اللاآدمية

أحلام:

آلو

خط أوزوانا:

آلو أيوة معاك خط أوزوانا للشكاوى والأعطال وتعطيل المراكب السائرة.

أحلام:

مش عارفة أبدأ منين اهيه اهيه اهيه

خط أوزوانا:

من أي حته خلصينا.. حضرتك ممكن تبدئي من الآخر.

أحلام:

قصتي تبدأ من أول يوم بعد ٣٠ يوم بصل، ومع أول يوم ثوم.



## <فلاش باك>

### الحاجة أوهام:

"تستاهلي.. مانا قلتك مينفعكيش ابن (وش السعد)، بس انتي اللي ركبت دماغك.. سبتي ابن المعلم (عملهم على قلبه) واتجوزتي المتعوس (كابوس) اللي من يوم ما اتولد قطع الخلف عند أمه وأبوه، حتى جوز عمته (مسعدة) انتحري.. فضل مستني كابوس يشرف عشان ينتحر ويكتب جواب وداع "مع كامل حبي وسعادي يا مسعدة.. حسيبك الكنبه كلها تبرطعي فيها لوحدي"

"وجوز خالته اللي طلق خالته (طلقني بالثلاثة) يوم طهور كابوس بعد عشرة ساعات وسنين أشغال شاقة مفياش مؤبده"

"وأغلب شباب عيلته يا إما مشردين في المراحض العامة أو منتشرين بين مقالب الزبالة أو غرقانين في نص البحر الميت، واللي فلح منهم أهو قاعد بيلقط رزقه، خبر من ناسا خبر من ماسا وياخد سبوبة حلوة، وفي الآخر أهو اتقبض عليه من عصابة (سلمني شكرا).. بجد بجد نسب يشرف"

وفضلت ترغي ترغي ما بطلتش.

### أحلام:

مامي من فضلك كفاية! تعبتي أعصابي بكلامك الشؤم ده!

ففععتي مرارتي! فرقني إيه عن تيتا (مشؤومة) الله يرحمها؟! كانت طول الوقت تقطع في فروة اللي جاي والي رايح خلت الكل عريان، ماسابتش حد لا كبير ولا صغير لا ست ولا راجل، حتى الجيران ما سلموش منها في الطلعة والنازلة قشر موز واحدف على السلم، اللي نازل يتزحلق والي طالع يتطوح فيه، حتى المنور ركبتله قفل لغاية دلوقت ماييتفتحش.. بجد كده عيب لازم ترتقي شوية دانتي بنتك الألفا أحلام الطويل.

### الحاجة أوهام:

أنا مش فاهمة انتي متفرعنة على إيه وطالعة فيها! من ساعة ما عزلنا من البدروم وطلعنا السطوح وانتي خلاص اتعودتي مفيش سقف يلمك.. بلا هم! وآل مامي آل! سمعتيها واتعلمتيها منهم.. آدي آخرة وقوفك قدام المرايا كتير.. اتجنيتي خلاص وأبوكي الطويل فضل يدلع من ناحية وأنا أحدف الشبشب من ناحية تانية، كل ما أحدقه يدخل للجيران.. واحدة زبي خبرة كام سنة في التنشين ماعرفتش تلم بيتها يلا بلا هم أهو غار وريحنا.. فضل مكلبش في الدنيا سنين وسنين.. أصلي اتجوزت وأنا صغيرة.. كنت أصغر واحدة في العيلة اتجوزت أربعناية وأبوك وقتها كان بيلعب.. يلا مش مهم كان بيلعب في كام أهو المرة الوحيدة اللي لعبها صح خلفناكي.. ومن بعدها بشويتين كثير كنتي كبرتي وأكيد فاكرة جتله سكتة دماغية عشر سنين ساكت وأدهم مروق الدماغ، لغاية لما جاله قضاءه أخذ رجليه وسبهولنا، وبعدين أخذ دراعاته غرغرينة صعبة سابتهولنا هو والقرض، وأول لما عرف إنه لازم يسدد راح مسدد

نفسه مكان القرض.. اتكل وسابلنا القرض وكان فاكر إن التأمين على ما تبقى من جسمه حيسدد القرض، أهو أخذ التأمين في دفتته وسابلنا القرض برده.. بس بصراحة الرجل كان نزيه.. كان شايلك قرض في الدولار ليوم خرجتك أقصد طلعتك وطلاقك من كابوس.. حبيبي كان عامل حساب كل حاجة سبحانه الله مع إنه كان نص راجل أغلب حياته بس الرجولة مش في الجسم ولا العضلات.. الرجولة في القرض. بس الغريبة إنه مات ولسة القرض عايش يالهوييييييييييييييييي

أحلام:

حرام عليكي يا مامي انتي السبب في موته في عز شبابه مش القرض، وكمان بتفولي عليا بالطلاق وأنا لسه مخلصه شهر البصل ومالحقتش أشم شهر الثوم"

خط أوزوانا:

حضرتك أخذتي أكثر من وقتك توت----- توت ----- هذه رسالة مسجلة.. الرقم المطلوب موجود وعامل نفسه مش في الخدمة ----- توت ----- توت.

\*\*\*\*\*

السلامة

شمر كمك واضرب المدير

الكتاب

أحلام:

"لأ لأ ماتقفليش الخط أرجوكي استني توتتستتت توتتستتت"

كابوس:

"أحلام أحلام فوق فوق"

فين المية؟؟

اصحي اصحي"

أحلام

"انت مين!"

كابوس:

: "أنا كابوسك"

أحلام:

"انت تاني وكل يوم مفيش فايده.. مفيش يوم أفوق من كابوس  
في منامي إلا والأقيك كابوس قدامي ده حتى أحلامي  
مستقصداني أعمل إيه بس!?"

كابوس:

"أنا حسيبك البيت معنديش وقت لكوايبسك آل ---- وخليكي

في أحلامك وأوهامك وبرده حيقفلوا في وشك الخط كل مرة وأنا  
حقوقك بالمية عشان تفوقى"

كأبوس هبذ الباب وراه زي كل يوم عشان يلحق يروح الشغل  
بالك بك.

وفضل يطير بالبك بك بعد ما حمله بالزباين من الحارة الي ساكن فيها، وأهو بيستزرق على الطاير كده مدام الي راكب على سكته مش حيخسر.

وفضل طائر به بسرعة عشان يلحق يوصل مقر أكل عيشه  
مصلحة الضرايب، وأول لما وصل لقي الدنيا مقلوبة وواقفة على  
رجل عرحة.

موظف مطحون:

"كابوســـــــــــــــــــــــــــــس تعالى بسرعة شفت اللى حصل"

کابوس:

"شر فيه ايه!؟"

موظف مطحون:

"الموظفين عاملين إضراب النهاردة ومش عايزين لا يضربوا ولا يتضررنا"



كابوس:

"يادي الإضرابات! الواحد خلاص مش عارف يشتغل وياكل صميت في المصلحة دي!"

"هو في أحلى من إن الواحد ياكلها من ضربة إيده في خد اللي قدامه أو ياخله شلوت في جيبه أو رفصة في جنبه أو غزة في ظهره!"

موظف مطحون:

"بيقولك إن قرار (الضرب مقابل الغذاء) اللي بتطبقه المصلحة مفيهوش شفافية أو مساواة"

"يعني الواحد يفضل يشلت يشلت ومايخدش غير مشلت، واللي ياخذ لوكمية يطلع له كمية آخر الشهر"

كابوس:

"واللي زي بيدي بوكس بس ياخذ إيه؟؟"

موظف مطحون:

"ياخذ كوكو بوكس"

كابوس

"ما بحبوش"

موظف مطحون:

"اتعلم تحبه حد لاقى! ولو مش عاجبك هاته.. أصل أنا ما بيكفينيش ولا علقه بخدها أو عركة بدخلها.. أصل الجيم وانت عارف بيحرق أول بأول، والمداومات كمان حريقة يابني هما والعيال ما انت عارف أفواه الأرناب اللي عندي في البدرووم.. طول الوقت طلبات طلبات عايزين جزر يتسلوا فيه مفيش هزار معاهم خالص.. دول ياكلوني أنا وأمهم (خبزtle خبزة) وضرتها (غمزtle غمزة)"

كابوس:

"مانت كمان غريب يا مطحون يا خويا من يومك، وبتاع ستات من أيام الجامعة الرياضية.. كنت بطل جمال أجسام والبناات بتموت فيك.. فاكر الجوابات اللي كانت بتتبعتك في رجل (دبور زن على خراب عشه) وقت المحاضرة.. كنت سهن مع إن الجامعة كانت جنس خشن بس --- بس انت كنت مظبط بنات (ثانوية بنسيون الداخلي) اللي جمبنا ومظبط (الدبور مرسال) كل يوم برسالة بوردة -----"

موظف مطحون:

"ما تفكرنيش بأيام الحرية الأبدية يقطعها أيام ما دامتش هما ١٠ سنين قبل قرار الرfid للي فوق سن الـ٣٠ ومن بعد الرfid اترميت في أحضان (خبزtle خبزة) كانت بنت الفران اللي تحتتنا.. بنت غلبانة حطلي عمل مسحور في خميرة الخبيز أنا

حاسس بغثيان من يومها حامل سحر وأنا مش عارف إيه اللي  
حصل لي لقيت نفسي ٤٠ سنة شاب ورور متجوز وجابتي ٥ عيال  
قالت لي دول عيال ك كان أبوها بيربيهم في البيت عنده وأنا  
صدقت لغاية لما قابلت (غمزته غمزة) القمر حبيبة أعماقي  
وعملت لي عمل تاني عند نفس الساحر عشان تكون ضرته  
وتفعل (المسحور على السحور).. ومن يومها وأنا عندي اتنين..  
واحدة بستخدمها يوم الحظر وتانية كل أيامها حظيرة

"العب وطير --- دا أنت واد خلبوص.. من يومك والجديدة دي  
جيت منها عيال ولا لسة؟"

"طبعاً مهى دى أم عيالى اللي متأكد إنهم مش عيالى.. أصلها من الستات النادرة عنها رحمين رحم يحمل وتانى يخلف على ما الأول يخلف يكون تانى حمل، وعد براحتك كام سنة فى كام شهر فى كام ساعة، وانت فاهم احنا شهور الحمل عندها ثلاثة مش بيزيدوا عن كده، وبيدخلوا بعدها الحضانة اللي جمبنا، ولو الرحم التانى فاضى ممكن يدخل يتحضر ويرضع ويتفطم ويخرج على الإعدادية يربى اخواته"

"یا ساتر! انا عشان کده شارط علی أحلام مفیش خلفه قبل ۲۰



موظف مطحون:

"بقولك إيه بينا على أوضة المدير خرينا نوقف الإضراب"

كابوس:

"نعمل إيه!؟!"

موظف مطحون:

"شمر كمك واضرب المدير"

\*\*\*\*\*

الكتاب

يوم حذر ويوم حظيرة

الكتاب



أخيرا وصلت أحلام السجل المبني الي بتشتغل فيه متأخرة، وده العادي طبعا، متبهذلة وعرقانة وده أكيد عشان الأتونيس كان فاضي مش زي كل يوم، وفي كامل أناقتها البادي في حنة وكارينا في حنة تانية خالص.

أحلام:

(في سرها)

"كابوسسسسسس منك لله اتهدلت بسببك.. مستخسر تركبني البك بك معاك وتوصلني الشغل بحجة إن مفيش مكان يدوبك يساع العشر عيال ولاد الجيران الي بتأخذهم توصلهم على سكتك وإن الرزق يحب الخفية.. وأنا أصلي واحدة ولية مخفية من حياتك بس الحقيقة إني حكون خفيفة ومفترية وحقلع القناع وأظهر النعناع المنعنع الي جوايا وحريك نَفَس داخل ونَفَس خارج"

معصومة: (في سرها)

"أهه شرفت أهه وحشة زي كل يوم --- عرة زي كل مرة ---- برة الموضة زي كل شهر---- بس بشرتها بنت الإيه كلها حبوب وحفر وإغراء تجنن يا ترى بتعمل إيه!"

أحلام:

"صباح الشر"





حينفع لا برة ولا جوة.. طب ياختي يبص جوة الأول وأنا  
موافقة يبص برة حلاوة روح قبل ما تطلع خلاص.. السن وله  
أحكامه حناخد زما وزمن صحباته!؟"

أحلام:

"طب والعقل له إيه!!؟؟"

نظيفة:

"ليه أوهامه ليه خيالاته وأكد زلاته"

عين:

"أيوة ياختي خليكي كده عاملة فيها بتتكسفي وانت تلاقيني...."

الحاجة منكوشة:

"يوه يا بنات سامحوني كنتم بتقوله إيه؟! أصلي نسيت وغبت  
ساعتين عن الوعي.. آه ----- افكرت خلاص.. فكرتوني بالذي  
مضى مع المرحوم (الحاج مفروود).. فضل مفروود لآخر وقت يا  
حبيبي.. كان يروح بنفسه يجيب المعاش وهو صالب طول مش  
عايز حد يساعده حتى كرسي العجل ساب العجل يمشي لوحده  
وهو لوحده، ويا ريته عاش ولأ المعاش عاش آه اتقطع وقالولي  
ساقط قيد في كشوفات الوفيات معتبرينه مفقود، وأنا النكشة  
مش سايعاني عايزة أظبط الفورمة أصل بيقولوا الحياة تبدأ بعد

الترميل.. سيكون فيه تنميل وأنا عايزة ألحقلي يومين كده قبل ما  
الزهايمر يزيـد -----

نادرة ندر:

"يا حاجة هو انتي كل حاجة نسيها إلا موضوع المعاش ده  
مش نسيها؟! كل يوم تحكيه ثلاث مرات حفظناه خلاص! تعالي  
معايا أندرك ندر يرجعك ذاكرتك المفقودة في حرب  
الاستنزاف"

"صدقيني حترجع.. ده فيه شيخ مبروك أعرفه بيعمل العمل من  
دول ويرميه في (كوالا لامبور).. تقولي إزاي أقولك كوالا يبجي  
ياخد العمل ويسيب لامبور ويرجع ياخده بعد ضمان مفعول  
٣ سنين.. يكون العمل اشتغل ولامبور لاجئ سياسي اشتغل  
إعارة عند واحد أمور، وبكده ضربتي كل العصافير في كوالا  
واحد، والندر واحد ريح الكل وشغل الكل وتلاقي نفسك بقيتي  
من الأسباب اللي بتساعد الشباب اللامبور الأمور"

أحلام:

"هي تسبيكة فين النهاردة؟؟"

عين:

"غاية ياختي مانتي عارفة ما بتفوتش يوم حظيرة أبدا.. بتفضل  
قاعدة تعلف في جوزها البشمةهندس (أورد يحي أد الدنيا) لما

وزنه عدى الدنيا كلها، ويعمل رايت ويبروح لدكتور (تخفيف  
التعريف) الي على أول ناصية بيتهم.

معصومة:

"كل كلامكم حرام وماينفعش، وما تقوليش تنفيس عشان ده  
تهيبس.. وأنا ساياكم للتدليس ومبروك عليكم إبليس الي جي  
من أبيس"

عين:

"شوفوا الولية معصومة فاكرة مفيش حد غيرها معصوم من  
الغلط وهي كلها على بعضها غلط في غلط.. قعدت سمعت  
الحوار كله وفضت مراتها ضحك وغمز بعين ولمز بعين ولما  
الحوار خلص قالتلك تدليس وإبليس وأبيس ده هو ده  
التهلييسسسسسسسسسسسسسسسسسسس"

\*\*\*\*\*

السلامة

الكتاب



خالقاتك برجلاتك

الكتاب

حماتها أم السعد:

"ألون.. صباح الشر على عيونك"

أحلام:

"أهلا يا تنت عامله إيه؟"

حماتها أم السعد:

"مالك ياختي بتتكلمي من غير نفس كده ليه؟! ---- كابوس مزعلك؟" (في سرها) "يا رب يطلع روحك"

"قوليلي بس وأنا أكرسك دماغه الطرية المهلبية"

أحلام:

"أصلي قائمة النهاردة حاسة بهمدان وجسمي تقلان وفي عنيا حolan وروحي زهقان وحاسة إن عندي غثيان آآآآآآآآآآه"

حماتها أم السعد:

"يا ألف انهار اسود يا ألف نهار منحوس.. هو عملها الموكوس!!؟ ----- قوليلي تاني كده وعيدي عليا"

"لالالالالالالالالالالالالالال لا شكلك كده حبلن هبلن"

أحلام:

"إيه!؟"

"قصدك حامل يا تنت؟ --- مش ناوية تطبطي النطق؟ ----  
بس إزاي لا يمكن ما ينفعش!!!!"

حماتها أم السعد:

"ليه ياختي مش كابوس جوزك برده ولا جوز عصابات!?"

أحلام:

"ماقصدش يا تنت أصلي عاملة حسابي أنا وهو إننا نأجل  
الموضوع ده كمان ٢٠ سنة عشان المعاش الاحتياطي يكون  
اتصادر واتوافق عليه"

حماتها أم السعد:

"لأ يا ميمي ماينفعش الكلام ده.. ماحدش يعمل كده خالص..  
مانتي عارفة إن فيه حظر للخلف في أيام الحظر عشان تحديد  
العصابات وفرز تعداد الحشرات وكده ولا كده.. ما انتي فاهمة  
إن الأكل مزروع جوة مبيد وأغلب المدامات عندهم تشنجات  
وتكيسات في الكياس ومافيش حشرات بتثبت إلا ولازم جوة  
أنابيب الصرف ومحدش عنده صرف ولا يقدر على الصرف،  
فكده ولا كده انتي في نعمة في كل حاجة.. احمدي ربنا دانا لو  
بدالك أعمل فرح وهيصة وأعمل سبوع من قبل ما ييجي  
المسروع وأطاهره في ظهري قبل ما يتولد"

"ماقلتيليش حتسموه إيه أكيد أكيد على اسمي (مسعد) ----  
---- (سعدت) ---- (سعد وراح) ---- (مسعود ويمكن متعوس) ----

(تعسة) ----- (سعدة) ----- (مسروع) أحسن على اسم  
المرحوم.. الله يجحك يا غالي زي ما دفنتي في التُّب ٣ شهور!"

"هو أنا ماقلتلكيش حكاية التُّب!?"

"يلا تعالي أما أقولك!"

"في مرة قلت (لمسروع) أول لما اتجوزنا على طول بعد ١٠ سنين  
(أنا مش عارفة مالي كده كل لما أحمل في حشرة ما تثبتش)..  
راح واخدني عند المزين، خدني قلمين على وشي وقاللي-----

<فلاش باك>

المزين العتيق:

"بصي مالكيش غير الزار.. أول لما تحسي إن الحشرة بدأت  
تقرصك على طول جري على التُّب.. شوفيلك تربة تكون  
جديدة كده من مية سنة مثلا وافتحها طبعا بعد إذن الحي  
عشان كله يبقي قانوني، ونامي علي ظهرك والحي كله طبعا  
يكون موجود عشان يشهد بالحق في محكمة الأشرة وتروح يا  
أستاذ (مسروع) واخد الفأس وخابطها على راسها، الدم اميت  
الأزرق حيطلع وعلى طول تحيب (البلدوزر) والدتك تروح  
ناطة عليها مانا عارفها آخر مرة جتلي كانت ٣٠٠ كيلو وعايضة  
تزيد ١٠٠ كمان زمانها زادتهم سلملي على اللي تلحقه منها ----  
نرجع لموضوعنا.. تنزل بكل عزمها على ظهرها تبسطها من

القهر، وبعدين طيران تروح جايب البلدوزر الثاني أبو عجل حديد ده وتردم عليها طن رملة، وتقفل بالرخام وتبت بالأسمنت ولو فيه أسفلت رش على الوش عشان تقفل التربة كويس، وتجيلها بعد ٣ شهور بالتمام والكمال ومعاك إذن نفس الحي طبعا وانت وحظك يعني لازم تقدم من دلوقتي على الإذن علشان يخرجلك في الخرجة التمام.. وتجب نفس الحي ثاني برده عشان يشهد في محكمة الأشرة مانت فاهم لازم ضمانات.. على ما تشيلوا طبقات التحنيط اللي على التربة حسمعوا صويت كل لما يعلا استنوا شوية عشان المدام حتكون في مرحلة الوضع ووضعا حيكون مش مضبوط عشان الحشرة بتطلع من ظفر الرجل الصغير مع إنها بكريه، وحشرة ضخمة وعفية، بس برده مش مهم تكون في إيدك مفرش وماية نار أول لما تظهر الرؤية على طول احدف مية النار على ظهرها عشان تكوي وتعقم الجرح، والحشرة اللي خارجة دوسها برجلك انت والحي كله نفر نفر ---- ولا يهملك حتكسرلها ضلع حيطلعها ضلوع، وحتكون حشرة مدربة على العذاب من صغرها، فمهما شافت بعد كده حتقول كله يهون مانا أصلي مش واد دلوع.

حماتها أم السعد:

"تفتكري يا ميمي الحشرة دي طلعت مين يا حبيبتى؟؟ حزري فزري.. وطلعت من نصيبك واسمها من اسمك لما بتتخذي وييجيلك جاثوم يبقى مين؟؟ وماعنديش غيره؟؟ يبقى مين يا ميمي؟؟"

وفضلت ترغي ترغي ترغي.

مهو أصل أحلام أقصد ميمي موعودة بالرغايين والأذكياء طول عمرها.

يا حبيتي يا أحلام!

### حماتها أم السعد:

"طب بصي يا ميمي ألحق أقفل معاي عشان ألحق طابور العيش من آخره وأوصل الخبر وأنشره على منشر الغسيل وألم المباركات والمعائدات والشماقات والحسدات والعينات والسحرات والتهيصات وألم النقوط وأجهزك الزار المعتمر يلا يلا مع ألف شر ربنا يفرح قلبك زي ما نكدتي عليا وفرحتيني"

### أحلام:

"يا تنت يا تنت يا تنت آلون آلون آلون"

<sup>۱۱</sup>توتنتنتنتنت.. توتنتنتنتنت<sup>۱۱</sup>

"عدتني أم السعد بالهطل"

"مفيش فايذة عايزة أقول لها إني أنا مش حامل أنا واخدة دواء السكر"

[illegible]

\*\*\*\*\*

الكتاب



ناسا ولامانساش

الكتاب



جاثوم بيك:

"مساءكم سعيد يا بكوات أفنديكن جاثوم بيك الأرملِي وصل  
مفيش ترحاب مفيش قهقهات؟؟ --- احترامات؟؟ ---- رفع  
ذراعات؟؟"

"صحيح أصحاب الأصول لسة في وصول موصول محبوس في  
قصور مندور مخطور"

ناموس ناموسية:

"معلش أفندينا أصل العتب على عتبة القهوة وإحنا ماخذناش  
حالنا وانت جاي طائر ما لحقناش نستعد"

الأسطى عابوس:

"يا خبرز يا خبرز!"

ناموس ناموسية:

"شر فيه إيه!?"

الأسطى عابوس:

"وكالات ناسات نسيت وبتقول إن لقوا كوكب زي كوكبنا  
بالظبط وبيدور حوالين نفسه زينا في الزار بالظبط.. وإن لقوا

عليه مخرجات ومدخلات بني قايمن كانوا قآآآعدين ومش  
نآيمن زينا"

كابوس:

"سيبوني أتاوب كده وأرجعلكم.... أيوة أنا رجعت فهمني يعني  
إيه!!!"

ناموس ناموسية:

"المهم فتحوا باب الهجرة ولا لسة عشان ألحق ألم المدام  
والعيان اللي في البيت وطيران على هناك قبل ما يقفلوا دولاب  
الهجرة الغير شرعية"

كابوس:

"هجرة إيه بس ده كلام أهم من كده بمراحل وخطوات  
سنوات"

جاثوم بيك:

"عالم تافهة بتمشي ورا خرافات زمان وأنا كبير حبتين أكبر من  
دلوقتي.. كان اتخطف ابن عمي (إسقاط بيك نجم) وقعد ٥  
ثواني مخطوف وفضلوا يدورا عليه في كل خرم فيك يا عزبة  
دورنا في الطواحين دورنا في الأنهار دورنا في الأطيان دورنا في  
الطين حتى دودة القز دورنا جواها"



ڪابوس زيڪ وفيه ناموس زيڪ وفيه عابوس زيڪ.. انت تڪبر هو بصغر انت تصغر هو يڪر"

"جيل عريان صحيح من العلم والفن والمهارة"

کابوس:

"إزای!!!؟"

جاثوم بيك:

"يعني ابن عمي راح هناك وأنا خلاص لا بد لكم هنتننتننتنا"

"منا هو وهو أنا-----وبنبدل مع بعض كل شوية أما  
أروح هناك وأجييها لكم"

"زوووووووووووووووووووو زوغاننتننتننتننتننتن منا"

کابوس:

"هو انت منهم الحقني بالمعسلللللللللللللللل يا عسلللللللللللللل"

\*\*\*\*\*

الكتاب



کولا کولا بیشر ب کولا

الملك  
الملك

<السجل المبني>

<في يوم من أيام الحظيرة هاء هيئ ها هيئ ها هيئ>

فرشة السجل:

(ماشي بيغني وماسك صينية الشاي ويبدندن)

"أنا أنا أنا هوه وانت انت انت هوه والعيال ما بينا أهو"

إما لففتك محاللكم إما وديتك مآتم إمة خليتك -----

أحلام:

"صباح الشري يا عم فرشة"

عم فرشة:

"صباحو يا أستاذة"

أحلام:

"مالك النهاردة الغمة مش سيعاك!?"

عم فرشة:

"النهاردة أصل الذكرى السنوية لخرجتنا أنا والمودام"







**<وراحت ومسكت الملاية وما جت تحركها>**

"ایہ دہ مین دی الی قدامی دی

دی شبھی ولا انا نسیت شبھی

ولا هي أنا وأنا مش هي؟!؟

أرفع إيدي كده دي بترفع زي

أنزل إيدي كده دی بتنزل زیی

[illegible]

آه صحیح دی شکلا ہی

یا ملایتی یا ملایتی مین اُطخن منی؟؟

## إليه السؤال الغبي ده!!!؟؟؟

## نجرې تانی

یا ملایتی یا ملایتی مین ارفع منی؟؟

إليه السؤال اللى أغبى من اللى فات ده

یا ملایتی یا ملایتی مین اُطول منی؟؟

لا برده

يا ملايتي يا ملايتي مين أقصر مني؟؟

يووووووووههههههههههه!!

يا ملايتي يا ملايتي مين أحلى مني؟؟

أبوة صح ده السؤال اللي يتسأل!"

>وفضلت مستتية ١٠ أيام قدام الملايا تكرر نفس السؤال قدام  
الملاية وهي لسه دماغها فلة من ساعة ما شربت الكولة، وفي  
اليوم العاشر من كتر جوعها واختفائها عن الأنظار في بدروم  
قصر الإيهام بدأت تفوق من الجوع.. منتم عارفين الجوع كافر  
وأول لما فتحت عينيها رقعت بالصوت وفاقت على المصيبة  
وبدأت تهمهم وفجأة<

"يا ملايتي يا ملايتي.....يا لف  
الحق.....لاوتعالى غطينى....."

\*\*\*\*\*



الكتاب

الكتاب

بواقى تصدير

الكتاب

<في مصلحة السجل المبني>

آنسة عانس:

"سمعتوا يا متجوزين آخر خبر؟"

كلهم في نفس واحد:

"إيه حناخد حلويات على مراتبات؟!"

آنسة عانس:

"لا يا فالحة انتي وهي حتاخدي بواقي تصدير السكان كل آخر العام"

نظيفة:

"ده خبر هایل.. كده أنا ضمنت إن الحشرة تنبت في الأنابيب من غير صرف.. دانا ممكن أنبتلي ٥ في أنبوبة واحدة كل مرة"

"آه الصيف جاي وينفعه برده ويرازوا المصيفين في السخنة والسقعة.. وناكل إحنا عيش من تقريصهم في الخلق، والله وصبرت ونلت"

"سنين طويلة وجوزي (نضيف نص نص) يقولي: اصبري شوية كلها ١٠٠ سنة والأنابيب تفتح"

وأنا أقوله: "أبدا ماستناش على الطبيعي لازم أروح أجرب أنبوب الصرف، ولا انت مستخسر فيه وفي حشري، ولا شيلهم لأمك الحشرية من بعد ما أموت هي ترتاح، تاخذ جوزي ثاني مني وعليهم تحويشة العمر"

تسيبكية:

"يعني أنا ناقصة كمان بواقى تصدير، مش كفاية القصدير الي عندي في البيت"

الحاجة منكوشة:

"على أيامنا ده كان رزق وخير يقطعكم قطعته الخميرة من ساعة ما جيتم واحتلتيوا الأرضية وبقت الحالة طعمية خالص.. والمصيبة إن الي يحتل حتة مفروض يدي فرصة للي عايش فيها إنه يهيج عشان الزحمة.. لا ده بيحتلها بالي عليها، من ساعة ما جيتم وأنا جالي زهايمر مبكر حتى الموت مش عارفة أموته بقيت بتحلل في الأرضية وبتاكل في جسمي النملية وبطلت أقعد على الطبلية"

وفجأة شخرت وراحت كالعادة في الغيبوبة -----

حقطعله ذيله:

"مالك يا حاجة كده فايقة علينا النهاردة عايزة إيه يعني مش كفاية مستحملينكم تحت شعار (استحملوا سكان الأرضية

الأصليين أصلهم لسة معميرين)؟!"

آنسة عانس:

"مش بعادة فايقة من الغيوبة! يوه دانتي رحتي فيها! نفسي مرة أرد عليكي تسمعينني.. كل مرة آجي أرد ألايكي مغيبة"

أحلام:

"قمة الظلم الطريقة اليي بتتكلمي بيها يا أستاذة (حقطعله ذيله).. سيبني الحاجة تفضفض ده جيلها كله اتظلم من ساعة ما جينا واحتلينا الأرضية وهما مش ييفوقوا من الغيوبة مش مصدقين التطور اليي احنا فيه همه اتفاجؤم من ألفا بوك اليي استوردناه معانا وعصفورة تويتي اليي ركبناها في الجو والحاج تاج اليي بقينا بنختم بيه أسامينا في المصلحة وغيره وغيره ---- بجد بجد أوفر عليهم ده حتى الموت حطتهم وايتنج ليست بسبب الحظر بس قوليلي يا (آنسة حرة) بواقي التصدير ده ليه؟"

آنسة عانس:

"حبيبتي يا أستاذة أحلام انتي الوحيدة اليي بتحترميني وبتقوليلي (حرة) مش (عانس).. دانا من كتر ما بتتقالي من يوم ما اتولدت اتعودت عليها واتعودت أعيش وحيدة حتى ضحكتي بضحكها لوحدي عشان محدش يشمت ويقول دي بتضحك شكلها فرحان ----- إهيئ إهيئ إهيئ إهيئ"

"المهم يا قمر بواقي تصدير ده معمول مخصوص عشان الكواكب اللي حوالينا منعت تستورد من عندنا غير حشرات فرز أول بيقولوا لما فتحوا الاستيراد من سنين كان كل اللي بيتصدرلهم حشرات عندها توحد فقرروا يسيبولنا التوحد ويوزعوه على الموظفين بدل العلاوات.. منها يرضوا الكواكب اللي حوالينا ومنها يلخموننا ومنها يقللوا حشرات الشوارع اللي انتشرت ومنها مخطط الحظر اللي ماجابش مفعول يتفعل وأهو كله تحت شعار (قبل ما تتوحش نرازيك بتوحد)"

أحلام:

"كلام غريب وحشرات فرز توحد دي بيحيوها منين"

آنسة عانس:

"ده أسهل منها مفيش.. دوري كده وانتي ماشية كام واحد فرز توحد موجود نتيجة خطيئة الأفا بوك.. دي أكثر ظاهرة انتشاراً انتي مش واحدة بالك ولا إيه؟! انتي ناسية إن في أيام الحظيرة لو واحد بس كلم واحدة على الأفا بوك عطول تتحفنا بحشرة مجهولة النسب تتحط في مؤسسات (دعونا جميعا نتحرش بالحشرة).

كام حشرة عندنا متسجلة باسم (فلان بن أفا بوك).. ده تقريبا بقى الأب الروحي لكل الفرز الجديد"



### نظيفة:

"حاجة تجن أكثر مانا نظيفة.. يعني واحدة منا تتجوز تحاول في أيام الحظيرة مفيش فايدة، وتخطفها في أيام الحظر وتلف كعب داير على الأنابيب ومفيش فايدة، وتقعّد على الأفا بوك محدش يعبرها من كثر نظافتها، حتى جوزها اتخنق من حسوكتها ونظافتها الزائدة بسبب ختان الأسنان وهي صغيرة، وتجرب أنابيب الصرف وتستلف عشان الصرف، وفي الآخر مفيش أي فرز لا أول ولا عاشر.. ويوم لما يقولولها حل يطلع الحل في بواقي التصدير"

"يا ختي لأ والف لأ----- لا أصدر ولا أستورد وأعيش من غير فرز خالص----- ولا لم فرز غيري هو أنا ناقصة بواقي أهل جوزي اللي مشرفينا كل أسبوع ياكلوا الأخضر واليابس من الدولار، لما حلم بواقي التصدير للناس كلها يغور الخلف!?"

### تسييكة:

"بس يا نظيفة يا ختي اللي فهمته إن ده إجباري لازم نشارك فيه.. ده عمل فوقي وحيحل مشاكل حشرات الشوارع لما يلاقوا بدروم يلهمهم وعيلة تضمهم ومجاعة تهدهم بدل ما هما كده فرز لبي مالوش فرز مش عارفين يفرزوههم ولا يغذوهم"

### أحلام:

"فعلا ده عمل فوقي عالي أوي وكله مصلحة للكل"



الكتاب

الكتاب

غزو الحاجات والمحتاجات

الكتاب

أحلام:

"كابوس كابوسي كابوس"

كابوس:

"نعم"

أحلام:

"انت ليه مش رومانسي وعاطفي!?"

كابوس:

"يعني إيه عاطفي؟! يعني زي عاطف ابن الجيران.. أنا اسمي كابوس مش عاطف وانت اسمك أحلام مش عواطف.. انتي جراك إيه!!!"

أحلام:

"انت مش بتراعي خالص مشاعري، ودأبما جايبلي إحباط.. انت بخيل في كل حاجة حتى في الحب"

كابوس:

"أنا شكلي حسيبك وأنزل أنام في القهوة زي كل يوم.. بس المرة دي مش حطعلك على الغدا أصلك واحدة نكدية وأحلامك دي مودياكي في داهية.... ها ----- حلمتيلي كابوس النهاردة زي كل يوم طمنيني؟؟ مانتني تشوفي الحلم من دول تفوقي عليه

وتفتكري لما تفتحي عينك"

"أنا سمعت إن فيه جهاز اخترعوه في كوكب ثاني وقريب  
حيوصل لنا، الجهاز من دول يخلي الرجل يراقب مراته وهي  
نايمة يعرف بتقابل مين - بتشوف مين - بتكلم مين - مين  
يلعب في دماغها وبيقويها على جوزها ----- دا آخر إحصائية  
للمحاكم بتقول إن (أحلام الستات تسبب فوضى عاطفية بين  
جموع الرجال)،،، الحقيقة أنا مفهمتش بس مادام جابوا سيرتك  
في الموضوع يبقى فيه إضراب جديد في الأرضية.. وبصراحة  
كفاية عليكي كده أنا مستنتي الجهاز وهو اللي حيفهمني مين  
الثوار العاطفيين اللي عاملين فيكي كده،،،، والواد اللي اسمه  
عاطف ده أنا حبيب أجله بأيدي.. يا يغير اسمه يا يسييني أنا  
أغيرهوله"

أحلام:

"انت ما بتقولش حاجة جديدة.. معندكش ابتكار في تفكيرك  
اللي ما بيفكرش ده.. انت شخصية استهلاكية لكل حاجة  
إيجابية في حياتي.. خليت حياتي سلبية"

كابوس:

"إيجابية وسلبية؟! انتي كمان اتعرفتي على اتنين جداد من  
صحابتك؟! هو أنا ناقص عاطف وعواطف ومشاعر ورومانسية  
لما تقولي إن لسة فيه كمان ضيوف تانيين جاييننا إيجابية  
وسلبية؟! ارحميني بقى.. وأنا خلاص على القهوة رايح (سلام).."



ولا بلاش لتقولي سلام ده كمان تعرفيه"

أحلام:

(بتفكر جواها)

"كل يوم أقول حيتغير وشهر البصل يعدي والثوم يبجي  
وحيفهمني ومفيش فايدة.. بيروح ينام في القهوة ويسيني هنا  
لوحدي عشان ميدفعش أي عاطفة.. خايف عليهم ليخلصوا  
فاكر إن العواطف بتخلص لو اهتم بيا شوية أو قاللي كلام  
حلو.. ميعرفش إن العواطف مابتخلصش، وكل لما حيديها  
حتزيد جواه إهيئ إهيئ إهيئ"

(وجلست أحلام في فترة من التأمل والخيال)

خلاص أنا قررت أكتب مذكراتي وأحضر روح المرحوم الي  
حيساعدني في الكتابة، وأحط فيها حاجاتي وأكيد أكيد حلاقي  
فيها محتاجاتي.. يا ترى فين آخر مرة شفت بخور التحضير ولازم  
منه؟؟ ----- افتكري يا أحلام ----- افتكري يا أحلام -----  
أيوة خلاص افتكرت.. في النملية.

(إرشادات المستخدم للبخور)

خطوات كتابة المذكرات:

أولا: يجب عليك تحضير روح المرحوم العالمي الحاصل على  
جائزة نوبل (نوبل الكاتب) في ذكراه الثانوية. للتذكرة اليوم هو  
المطلوب انظر للي بعده.

ثانياً: التركيز عند التحضير جيداً حتى لا تحضر بالخطأ روح أخيه التوأم (نوفل الباشكاتب).

ثالثاً: الجلوس في مكان مزدحم عشان الفائدة تعم والكل يتلبس على خير.

رابعاً: عدم الحديث نهائياً مع روح المرحوم العالمي؛ لأنه عالمي مش حيفهم كلامك المحلي من الآخر فمتستظرفش.

خامساً: عليك بإشعال النار في الحضور، ورمي البخور المعلوم، وعند الإحساس بتنميل في الأطراف ومايكير في الأظافر تأكد إن المرحوم وصل وصل العريس وصل -----

سادساً: روح المرحوم ستتجلى في كائن حي قريب منك.. لا تهتم لأنك ستجده في حالة من التنفيس وعواء التهيس عادي لا تهتم.

سابعاً: أهم مرحلة: روح المرحوم حتكتشف إنها لبست واحد غلط، وفورا انت تكون لابس أي حاجة حمراء اللون؛ فهي إشارة لروح المرحوم التائهة إن الزبون ليس المطلوب وعليه التوجه للمطلوب وهو موجود، وستجد نفسك طريح الفراش لمدة ٧ ليال قمرية، وفي الليلة الشمسية ستستيقظ بمفردك بدون إزعاج المنبه لتجد نفسك شخص مبدع جديد وتحيي ذكرى العالمي (نوبل الكاتب) وربنا يجعله في ميزان حسناتك.

أحلام:

(تهمهم: طيب يلا نبدأ بتطبيق الخطوات)

"أولا: خلاص عملناها.

ثانيا: أهى دي اللي مش مضمونة الحقيقة أنا وحظي.

ثالثا: أنا أنزل أقعد عند حماتي في البدروم اللي تحت وأهو يمكن تتلبس هي والحي والفايدة تعم ونخلص، وأهو البيت عندها ما يبطلش زحمة.. الحي كله عندها كل يوم عشان بتحكيلهم حلقات المسلسل التركي اللي بتصورها من بلكونة البدروم بكاميرا الموبيل الآي-هون وهي بتدق بالهون وتنقل أخبار وفصايح الجيران كلهم، وتبثها على داتا شوز الحي اللي في آخر شارع سد في الحارة.

رابعا: أهو لزقت على بقي شكارة كارتون مش حنطق مع العالمي.

خامسا: وآدي كبريت في الحضور، وآدي إلقاء البخور، وآدي التنميل والمانيكير.. بس إيه الريحة دي؟! والكبريت ليه ماولعش في الحي اللي عند حماتي؟! ده حتى محدش شايفني حتى ولا مهتم إيه اللي بيحصل ده؟! وإيه الدخان اللي تحت الستارة دي؟! إيه ده مين انت؟!؟؟----- وريحتك كده ليه أنا مش شايفة غير عينين جوة الدخان!?"-----

الروح تتحدث:

"أنا روح (نوفل البشكاتب).. أصل أخويا التوأم العالمي (نوبل الكاتب) اعتذر عن التحضير اليوم عنده مؤتمر مهم، وبعطني اعتذرك قبل ما تكلمي تحضير وتقلقي منامه"

”بس البيت ده مش غریب علیا-----“

”لا لا لا لا حرام عليك! يوم لما تحضريني تحضريني هنا في بيت الولية (أم السعد) الي من يوم ما كتبت كتابها على الحاج مسروع كانت وش السعد علما وعليه؟!“

"أنا وهو اتكلنا في يوم واحد.. يوم لما اتفقنا وجابني عشان يطلقها ويخلص، راحت باخة فينا أنا وهو ومادرتش غير وأنا مع العالمي توأمي (نوبل الكاتب) وحولتنا بخور في النملية مهو أنا والعالمي مربوطين ببعض أصلنا توأم متلاصق من الإيد.. هو مرة يكتب بيقى عالمي وأنا مرة أكتب أبقي مأذون"

### أحلام:

"بتقول إيه؟! ----- أم السعد مين؟! -----"

"هي الولية أم كابوس ورايا ورايا؟! -- عايزة أفضض وأكتب حاجاتي ومحتاجاتي يا ناس!! وتقولي جاي تعتذر بالنيابة عن (نوبل الكاتب)؟! والنيبي لأقلق منامه وآخذ حاجتي من حبابي عينيه.. الحقوني بالعالميينiiiiiiiiiiiiiiiiiiiiii

\*\*\*\*\*

الكتاب

الكتاب

حوش حوش عني الوحوش

الملك  
الملك





كابوس:

"يعني إيه نعمل تحليل حمل عشان نضمن؟! ----- يادي  
النيلة هو أنا ناقص؟! --- أنا واحد ندل خخلع وأروح على  
طول.. بقولك إيه من الأول تاخدي كام وتدفني الضحية  
سكيتي في بير السلم؟"

أحلام:

"أنا موعودة بالوحوش في كل حنة برة وجوة!!! ----- الراجل  
الي جمبي في الأتونيس حاول ----- حاول يسرق مخلتي الي  
بحطها فوق دماغي، ومسك المشرط وشرط دماغي بدل المخلة"

كابوس:

(في سره)

"عفارم عليه - يا ريته كان ركز أكثر وخلصنا"

أحلام:

"انت قلت حاجة؟"

كابوس:

"ألف سلامة عليه"

أحلام:

"إيه؟!?"

كابوس:

"ألف سلامة عليكى"

أحلام:

"الغبي افكر الطرحة المنفوخة بقية المخلة"

كابوس:

"مانتي الي بتنفخي البالونة وتحطي عليها الطرحة وفوقهم  
المخلة، وبتطقمي الطرحة لون المخلة.. طيب الراجل معذور  
عايز يسرق الي جوة المخلة كل أول شهر يعمل إيه!!؟ أنا متفق  
معاه على كده"

أحلام:

"قلت حاجة؟! ---- أكيد بيتهيا لي--- مهو لو كان طلب مني  
أساعده كنت ادتله الي هو عايز من غير المشرط ده.. دلوقت  
الجرح حياخد أيام عشان يتلوث ويخف على نظافة.. حروح  
الشغل إزاي؟! ولو فكرت آخذ أجازة معنديش أجازات.. أنا  
خلصت أجازات العوانس قبل الجواز الي بيستنوا فيها العرسان  
في الحديقة الأنثونيداس فاكرها؟ ----- وكمان خلصت  
أجازات المتجوزين الي بيستنوا فيها العيال الحشرات في  
الحديقة البيطرية"

كابوس:

"خدي أجازة وضع المواعين"

أحلام:

"لا فالج! ولما يكون فيه مواعين آخذ أجازة إيه؟! انت ناسي إن مامي مجهزاني بغسالة أطباق أد الدنيا حطاها في أودة المغزلين شوار لبنتي اللي لسة ماخلفتهاش، ومامي كانت شايهاالي ونينا كانت شيلاها مامي"

كابوس:

"آه فعلا انتم بتفضلوا تشيلوا المواعين وتكيسوها في الغسلات عشان تورثوها في عيلتكم.. لما الفيран أجيال ورا أجيال قاعدة تتكاثر جواها وقموت وتعيش ولسة الغسالة بكيستها.... بس مين يياكلهم ماقتليش \_\_\_\_\_!"

أحلام:

"بياكلوا بواقي الأكل اللي في المواعين اللي لسة ماتغسلتش اللي متخزنة جوزه الغسالة.. انت فاكر إيه؟! كل حاجة معمول حسابها! دي روح لازم نهتم بيها برقبتنا"

كابوس:

"فيران عجيبة عايشة على المواعين اللي لسة أصلا ماتغسلتش.. عامة انتم عيلة تخاريف.. خلاص خدي --- أجازة فطام المواعين"

أحلام:

"مانا قلت كده أحسن"

كابوس:

"المهم كملي.. وبعدين حصل إيه في الأوتونيس؟؟"

أحلام:

"تموت انت وتعرف التفاصيل لما يكون فيه مصايب.. بس في الحب والرومانسية إحم إحم----- المهم إن سواق الأوتونيس بدل ما يساعدني قالي مانتني تستاهلي.. نافخة طرحتك ليه كده مطمع!؟ --- هو أنا بنفخ البالونة تحت الطرحة ليه يا كابوس؟؟ أصلي نسيت من صدمة الاختطاف----"

كابوس:

"سألتك قبل كده وقلتي لي عشان بتحطي فيها ثلج عشان الحر..  
بتحبي تسقعي أفكارك وانتني في الشغل عشان تستحملي  
سخونة الحوار بين زميلاتك كل يوم"

أحلام:

"صحيح فكرتني.. مهو الثلج ده اللي نفع الجرح.. لولاه كان  
زamani رحت المستشفى والجرح ما تلوثش كويس ---- شفت  
إزاي أنا مكشوف عني الحجاب!"

كابوس:

"طيب قوليلي والبطل اللي حاول يسرقك ويقتلك فين عشان أروح أبوسه؟"

أحلام:

"الله يرحمه بأة كان طيب وكان عايز يقولي وصيته بس أنا مافهمتش.... لسة بقول "حوش حوش عني الوحوش" أتاها كلمة السر للعصابة اللي في الأوتونيس.. أتاري الأتونيس كله أفراد عصابة! وعشان تأنيب ضميره إن كلمة السر اتعرفت وإنه ما اخترش كلمة سر أسهل شوية عشان ماتتعرفش، لقيته من الخضة بيحتضر-----"

(فلاش باك في الأوتونيس)

العصابة:

"دانتي نحس يا ولية دي أول عملية لينا جبتيلنا إحباط"

البطل الحرامي:

"منك لله يا شيخة دانا كنت بنقذك من الخطف لما يلاقوكي معيوبة يرموكي من الأوتونيس وترتاحي.. بس صحيح تستاهلي اللي حيحصلك ----- بسك عليها يا وحوششششششششششش.... أنا مت خلاص"

\*\*\*\*\*

الكتاب

الملك  
الملك



نم نم نم ---- ولم النمل

الكتاب

أحلام:

"مامي مامي مامي مامي مامي مامي مامي مامي"

مامي أحلام:

"نعم يا أحلام"

أحلام:

"النهاردة كام في الشهر؟؟"

مامي أحلام:

"النهاردة يوم مهم.. عيد الجيفة.. اللي كل الحي بيخرج عشان ينم على بعضه في حديقة النمل وياخد معاه كام جيفة من العيلة وكام ليفة"

أحلام:

"فكرتيني بأحلى سنين عمري وذكريات الطفولة، لما كنت حموت وأكل من الجيفة تردي عليا وتقولي "إحنا جايينك معانا تشيلي اليفة وتليفينا وبس.. لو عايزة تاكلي كلي أي حاجة تانية نظيفة من الحديقة"، وأنا أبرم وأبرم في الحديقة إني ألاقى حاجة نظيفة مفيش غير بيت النمل اللي كان تحت الشجرة كنت أحب آخذ منه شمع العسل اللي بيعمله وأمضغه كان أحلى حاجة بحبها.. كل لما أجوع، وفي يوم رحت عند الشجرة سمعت اتنين بيتكلموا -----

مامي أحلام:

"انتي ماتعرفيش تنسي أبدا يا ميمي!؟ فيه ذكريات لازم تنسيها  
عشان ماتتعديش في حياتك"

أحلام:

"بس دي كانت أحلى ذكريات في حياتي.. أول مرة أعرف معنى  
الحب الحقيقي وأنا كنت السبب فيه -----"

<فلاش باك>

حبيب:

"إزيك يا حبيبة؟؟"

حبيبة:

(مكسوفة)

"إزيك يا حبيب؟؟"

حبيب:

"عرفتي إزاي تزوغي من الجيفة وتجييلي الليفة وتيجي!؟"

حبيبة:

"قتلتهم حروح أعد الجيف اللي باقية وأرجعلكم على طول.."

من كتر طمعهم إن ممكن ألقى جيفة زيادة عند حد وافقوا  
على طول وسابوني"

حبيب:

"عندك قوة ملاحظة وإصرار في الحب تعجيبيني"

حبيبة:

"ما فيش أحلى من الحب فوق شجرة النمل"

حبيب:

"فعلا طول ماحنا قاعدين تحسي إننا منملين من كتر النمل اللي  
ماشي علينا، فالحب بيزغزغ مشاعرنا كويس"

حبيبة:

"الحب كله أنا شلته ليك في الليفة دية"

حبيب:

"الحب كله أنا شامه فيكي في الجيفة دية"

"حبيبتي ماقلتيليش.. هي الجيفة السنة دي كانت من نصيب  
مين؟"

حبيبة:

"دي جيفة عمي السنة دي"

حبیب:

"أتاري الريحه قوية.. أنا قلت أكيد جيفة ذكورية.. هو كان مات من إيه!?"

حبیبة:

"مات وهو يقطع البصل عشان الباربيكيو بتاع النهاردة.. فضل يعيط لغاية لما اتعمى وخبط في الحيط ومات"

حبیب:

"أعمار! أنا كنت فاکر إن الجيفة حتكون بتاعة مرات عمك"

حبیبة:

"يقطع الحب وسنينه! ماہانش عليه نحتفل بجيفة مراته ففداها بجيفته، وأخذنا ليفته کمان تکریمًا ليه اهیئ اهیئ اهیئ"

حبیب:

"کلك مشاعر.. انتي بتعيطي ليه يا حبیبتي!?"

حبیبة:

"أنا مش بعيط مانت شایفني جمبك أهه بضحك وفرحانة.. ده لولا جيفته ماکنتش عرفت أشوفك وأحبك النهاردة"

حبيب:

"ده معناه إن فيه حد بيتصنط على أسرارنا ولازم حنتقم منه  
وأكله بسناي"

(بعد فترة من بحث فوق الشجرة ---- جمب الشجرة -----  
---تحت الشجرة)

"انتي بتعملي إيه هنا يا بيبي وبتعطي ليه!!؟"

أحلام البيبي:

"أنا كنت باكل غسل الشمع بتاع النمل اللي تحت الشجرة اللي  
انتم قاعدين فوقها"

حبيب:

"يا حبيبتي! وطبعا النمل كان بيعيط عشان أخدتي تعبته وشقاه  
على الجاهز وأكلتيه عشان جوعانة"

أحلام البيبي:

"فعلا يا عمو حبيب.. أخبار طنط حبية إيه؟"

حبيب:

"يا حبيبتي! انتي كمان عرفتني اسمي واسم حبيبتي؟! أكيد  
النمل نم نم علينا وقالك"

أحلام البيبي:

(ابتسامة أطفال بريئة تغيظ)

حبيب:

"هو إيه اللي دخل جوة القميص ده وبيزغزغني ولا ده  
بياكلني!?"

أحلام البيبي:

"ده فل يا عمو أصله كان بيعيط وعائز ياكل وأنا أكلت الأخضر  
واليابس بتاعه فحطيت حته الشمع الباقية مني اللي فيها عسل  
في قميصك، وقلت مش حلاقي حد محبوب أكثر منك النمل  
ياكله ويعتبره جيفة الحب، وكل عام وحضرتك بخير وحب..  
شكرا يا عمو.. باي باي"

حبيب:

"حبيبة الحقيني انتي فين؟؟"

حبيبة:

"أنا لسة فوق الشجرة يا حبيب.. مالك بترقص ليه ماتكونش

حترقص وتطلب إيدي في يوم الجيفة يا حبيبي!?"



حبيب

"أطلب إيد مين يقطع الحب وسنينه! يا ولية دانا كنت طمعان  
في كام جيفة من عيلتكم وآدي آخرتها.. الحقيني دانا بقيت  
جيفةةةةةةةةةةةةةةةةةةةةةةةةةةةةةةةةةة

\*\*\*\*\*

الكتاب

خليك بعيد في بعدك

(أغنية [بعيد عنك حياتي عذاب] شغالة في القهوة  
والكل نايم عال العال)

الكتاب

القهوجي الغبي:

"بقول لحضرتك إيه يا فاعل الخير ياللي ماشي في حارتنا.. هو  
الدكان اللي جمبنا ده حيفتح إيه؟؟"

فاعل خير ماشي في حارتنا:

"بيقولوا حيفتحوا شاي يصحوا فيه اللي قاعدين عندكم في  
القهوة؛ عشان يزودوا البطالة اللي في الحارة"

القهوجي الغبي:

"بتقول شاي؟! يعني إحنا ناقصين منافسين وقطع عيش؟!

فاعل خير تاني في حارتنا بس مثقف وبنظارة وماسك كتاب:

"لازم يكون فيه روح منافسة رياضية بينكم.. هو ده الإصلاح  
الرياضي.. كل لما تزيد المنافسة يزيد معاها الصراع واللعب  
يحلو، ولما يزيد الصراع في اللعب يزيد الحسد والغل والعين،  
وتزيد الأسعار، فيكسب التجار ويخسر الأخيار ويجيبوا خيار،  
وفي الحارة تلاقي ناس تتقسم اتنين.. ناس تشرب شاي وناس  
تشرب قهوة"

القهوجي الغبي:

"طيب واللي ما بيشر بش شاي ولا قهوة؟؟"



(القهوجي بيلم زباين وبيوزع منشورات إن قهوته أحسن قهوة)

القهوجي الغبي:

"أستاذ كابوس ---- انت فين بقالك ليلتين مش بتنام عندنا ليه؟! خير ده حتى المنافسين لسة ما فتحوش! انت مالك مش سامعني ولا إيه!?"

(كابوس شارد رايح عند النفسواني)

نفيس النفسواني:

"بقولك إيه يا مشرط الأسعار الجديدة ----"

العادي ٥٠ والمستعجل ٥٠ و ٥٠ و ٥٠ و ٥٠ ويا ريت اللي بيجي قوليله مفيش من أبو ٥٠ خليه في المستعجل.. وجلسة التعويم بـ ٥٠ برده إجباري على الكشف.. خلينا نعرف أسرار الحارة كويس"

مشرط:

"حاضر يا بيه.. تؤمر بحاجة ثاني كده ولا كده؟؟ ههههههه  
يعني مفيش كده ٥٠ إجباري لمشرط على الكشف عشان  
بتتجهز وبتشور نفسها وكل بنات العيلة؟?"

نفيس النفسواني:

"لو مابطلتنيش رمي عين في رزقي وتعبي ونق يا مشرط، الباب يفوت فيل أكبر منك.. واوعي تفتكري إن الراتب بتاعك ده حد حيديهولك برة! دانتي آخرك تخدي نصه يا ماما! دانتي فيل.. من ساعة ما دخلتك هنا بالونش وانتي استحالة تعرفي تخرجي ثاني ----- حد طایل ياخذ ٥٠ كل سنة قمريه، وعلاوات أدهم كل سنة شمسية.. عالم حقودية اسم على مسمى.. فكراني مش عارف الي بتشرطيه من الي جاي والي رايح.. دانتي أغنى مني! ومن وهنا ورايح انتي الي حتديني ٥٠ كل أول شهر قمري من الي بتشرطيه، ولحمة العيد بالنص، وكعك العيد بالكيلو، وقرص المدافن حعدهم وراكي، والعيدية حتديها لي في كل الأعياد الرسمية والغير رسمية، وبرده مش حثبتك ولا حطلعك معاش لا مبكر ولا متأخر، حتفضلي هنا ولما تموتي حبسك هنا إكراما ليكي ولاجتهادك وتفانيكي في العمل، وأنا حبقى لسة شباب برودو وحفضل أشد وأصبغ وأصغر، وأشوف مطرح ثاني ومشرط ثاني مانتم كثير"

مشرط:

"روح يا شيخ ربنا يفتحها في وشك ويزيدك دانت ساترني دنيا وأخرة.. عمار عليكي يا حارة!"

كابوس:

"تصبخوا على شر"



مشرط:

"أهلا وسهلا.. هو فيه شر أكثر من وصولك عندنا؟! يووه هو

انت سمعتني!"

كابوس:

"كام؟؟"

مشرط:

"انت ونظرك يا نظري.. قدامك أهه الياطرة المنورة فسفوري  
٥٠ إيد النفسواني و٥٠ تعويم ومفیش غیر مستعجل ٥٠ و٥٠  
و٥٠ و٥٠"

كابوس:

"أنا ماعيش"

مشرط:

"ماعكش تدفع؟! طب جاي تشحت ولا إيه؟! استنى كده!  
حعملك خدمة أصلك عجبتي شاب حليوة اسود زيك وشعره  
أكرت وقصير أوزعة يجنن! ويعجب أي واحدة حلوة ووحشة  
زيي أو مش زيي! أصل أنا من بعد الفيلة زي مانت شايف  
هجمة.. فيل من نوع الي انقرض، جدودي انقرضوا مفیش

غيري أنا وكام زرافة في العيلة بصرف عليهم ومفيش حد  
بعجبه! وعمري ما سمعت كلمة إعجاب واحدة في حياتي.. وأنا  
مستعدة أدفع التمن بس أسمع قبل ماموت! فلو عاكستني  
وقلتلي إني مش فيلة وإني جميلة! حدفلك من اللي معايا!"

كابوس:

"بس كده!؟ ----- انتي جميلة انتي جميلة جميلة"

مشرط:

"آه يا قلبي حموت حموت!"

كابوس:

"لا أبوس إيدك دخليني الأول قبل ما تموتي ويتهموني إني موتك"

مشرط:

"ربنا يجبر بخاطرك خلاص حعيش حعيش ----- خلاص اتفضل  
ادخل للنفسواني مستنيك"

نفيس النفسواني:

"مالك بتشتكي من إيه؟؟ ولا أقول لك.. روح اغطس جوة البانيو  
اللي هناك"

كابوس:

"إيه ده؟!"

نفيس النفسواني:

"مش انت جاي عايز تعمل تعويم مغناطيسي؟! انت بس  
تغطس جوة البانيو وأنا احعرف كل حاجة من غير ما تتكلم..  
حيطهر على الشاشة دي وحيترسجل أوتوماتيك"

كابوس:

"يعني البانيو ده مغناطيسي حيعرف كل حاجة كل حاجة؟!"

نفيس النفسواني:

"أيوه.. ولو فكرت تفتح بقبك وتجب سيري حشرك على الأفا  
بوك ووديك في داهية"

كابوس:

"طيب تاخد كام وتسييني بعيد في بعدي من غير تعويم ولا  
مغناطيس؟؟ هو دخول الحمام اللي أنا فيه ده زي خروجه؟"

"الحقوني بخروج مستعجلللللللللللللللللللللللللللللللل!"

\*\*\*\*\*

الكتاب

قلب كابوس جوة معدته

الكتاب

(تمر الأيام وكلها شبه بعض روتين روتين روتين فين الجديد!؟)

<جرس الباب>

تسييكة:

"مين فوق الباب؟؟"

أحلام:

"أنا يا تسييكة ميمي"

تسييكة:

"يوه --- افكرت حد من عفاريت الجيران كل شوية حد يرن  
الجرس ويطير"

أحلام:

"عندي مشكلة وعايضة آخذ رأيك"

تسييكة:

"فيه إيه!؟"

أحلام:

"كابوس عازم مامته عندنا على غداء الفطار وأنا مش عارفة  
أعمل إيه ما انتي عارفة قدراتي"

### تسييكة:

"حقولك فكرة.. أنا قرئت في الأfabوك إن فيه ستات مش زينا بيعرفوا يعملوا أكل ويبعته مع طيار على موتورجل بسرعة في يوم العزومة، وممكن يسلموكي الطرد في محطة المتروباص إيه رأيك؟؟ واسم الجروبي بتاعهم (قلب جوزك مش في معدته قلب جوزك في جروبي عندنا)"

### أحلام:

"دي فكرة مجنونة بس عجبتني.. والخدمة دي مجانا طبعا"

### تسييكة:

"مجانا إيه بس؟! لا بالمقايضة بس.. يعني لو عندك هدوم لجوزك مش عايزها تبعتها الأول في نفس محطة المتروباص تبعتك نفس الطيار ياخدكم منك ويوعدك إن الاوردر يكون جاهز ثاني يوم في نفس مكان"

### أحلام:

"يعني أنا كده يدوبك ألحق أعملها شير وأب لوود وداوون لوود من الأfabوك عشان أبعثها كام بيجامة من بتوع كابوس النهاردة وآخد مكانهم بكرة (صينية مكرونة في الجون) (رز بالخلطة السحرية) (لحمة فوقي يا تيتا) (فراخ نامي يا تيتا فوقتي ليه) (سمك شبكة)"



"طيب مع السلامة يا تسبيكة.. سلميلي على الأستاذ أورديحي  
وبوسيلي (تختخ-تخت شرقي-تخت غربي)"

تسبيكة:

"مع السلامة" (وهبت شراعة الباب)

"ستات أول الزمن فعلا! مش عارفة تعمل حاجة اتجوزت  
ليه؟!----- هي المشرحة ناقصة قُتلة؟! هي ماتعرفش إن قلب  
الراجل في معدته!!؟؟"

أحلام:

"فتحنا الأفاعوك"

ندور كده على جروي متخصص في الأكل.. أم أم أم ----- أهه  
لقيته!"

[قلب جوزك مش في معدته قلب جوزك في جروي عندنا]  
(نحن في خدمتكم للمقايضة من أي قطعة من الدولار عندكم  
بأي قطعة من البوفيه والنيش عندنا)

أبعتها ماسنجر كده يا رب ترد -----

"من فضلك أريد إضافة"

"من فضلك شكرا على الإضافة "

"من فضلك ربنا يجبر بخاطرك على الإضافة"

"من فضلك عجبتك الإضافة؟"

"من فضلك إيه رأيك في مشاركتي الفعالة في الجروبي؟"

"من فضلك عايزة أقايض ممكن؟"

دمل الجروبي:

"دمل الجروبي مع حضرتك"

"أهلا بيك"

"يا ترى أول مرة تضيفينا عندك؟؟ مش مهم تجاوبي ---- يا  
ترى حتقايضي بكام حته من دولاب جوزك أو دولاب عيالك  
الصغار أو الكبار أو دولاب حماتك أو جارتك براحتك؟"

أحلام:

"حقايش بثلاث بنطلونات بيجامة وفانلتين مرفوفين وملفوفين  
وشراب مخروم خرم بسيط، وفيه كم غيار لو ممكن"

دمل الجروبي:

"غيارات ممنوع يا فندن مش ناقصين إيدز! كفاية الكوليرا اللي  
في الأكل اللي في النيش.. تمام يا فندن حضرتك عارفة المنيو ولا  
أبعتهولك؟"

أحلام:

"منيو إيه مفيش وقت؟! أنا حطلب حاجات سهلة"

(صينية مكرونة في الجون)

(رز بالخلطة السحرية)

(لحمة فوقية يا تيتا)

(فراخ نامي يا تيتا فوقتي ليه)

(سمك شبكة)

دمل الجروبي:

"مفيش سمك شبكة.. فيه عندنا سمك سنارة بايت.. ولا بلاش أقولك بلاش أحسن مش مضمون البايث.... سلم واستلم امتى يا فندن وانتي أكيد عارفة فين"

أحلام:

"كمان ساعتين حكون لابسة جلابية بيت عشان يعرفني الطيار"

دمل الجروبي:

"تمام أوك ميعادك اتأكدتف على السيستم والأكل حيكون جاهز بكرة في نفس الميعاد بعد معاينة المعلوم ومقايضته بالمجهول"

أحلام:

"يدوبك أفتح السندرة وأنزل منها حاجات الصيف المعفرة"

"أيوة أيوة لا انت بلاش --- انت كويس --- انت سليم خليك -  
-- انت مقرح تعالى"

"يلا بينا!"

(وركبت أحلام الأوتونيس وراحت محطة المترو باص)

أحلام:

"أنا وصلت في ميعادي أهه.. هي مالها الستات كلها لابسين  
زي النهاردة وشايلين في رجليهم نفس الكيس!!?"

"سؤال لحضرتك.. انتم لابسين جلبات بيت زي ليه!!?"

فاعلة خير مجنحة بالجلابية:

"النهاردة يوم الفقر العالمي، وإحنا كأعضاء في جمعية الخير  
العالمي قررنا إن النهاردة نلبس جلابية بيت ونمسك كيس فيه  
مخلفاتنا المنسوجة عشان نلهم ونتبرع بيهم للفقراء في العالم،  
وجلابية البيت رمز إننا عايشين مأنتخين في البيت ومرحرحين في  
الرفاهية، وغيرنا عايش في الفقر مش عارف يقايز أو يتقايز  
غير باعضائه، وبقت تجارة الأعضاء شغلة كل من لا شغل له  
اليومين دوول"

"تعالى هنا! ---- وانتي بتسألني ليه؟! وشكلك سهتانة! ماتكونيش  
جاسوسة مدسوسة! وريني الكيس اللي معاكي ده ومكتوب  
كمان شفرة!?"

(صينية مكرونة في الجون) = يعني الهدف اللي هو إحنا في الجون.

(رز بالخلطة السحرية) = يعني الخلطة السرية اتكشفت!

(لحمة فوق ياتيتا) = يعني لحم المواطنين فاق وبقاله صوت ويحتاج على الفقر.

(فراخ نامي ياتيتا!! فوقتي ليه) = يعني زي ما فقتم ناموا ثاني ويبقى معناه زي ما فوقتونا ودوقتونا اللحم نيمونا بعد ما تدوقتونا الفراخ = والفراخ رمز للجبن = يعني من الآخر انتي جاسوسة محترفة = ويا ويللك = يا سواد ليلك"

"ستات الجلاية اجمع اجممممممممم!! الولية دي جاسوسة ضد الإنسانية العالمية، وجاية تفك شفراتها ما بينا، وماسكة كاميرا بتصورنا بيها وكاتبة في الكيس مع الهلاهيل (مقايسة المعلوم بالمجهول)، تبقى الست دي مين وتستاهل إيه؟"

جموع الستات:

"زي ما جابت المعلوم عندنا لازم نطبطها بالمجهول من عندنا!"

أحلام:

"حرام عليكم انتم فاهمين غلط! أنا جاية أقايش أكل العزومة بهلاهيل جوزي، وده تليفون واي فاي بإريال طويل عشان يلقط شبكة الأفابوك في المحطة وأكلم الجروبي"

جموع الستات:

"وكمآن فيه عزومة وجروبي وشبكة؟! يعني جايبة معاكي وسائل  
الإعلان والإرسال كلها!"

"ستات الجلابية كلکم بإيد واحدة نقضي على الجاسوسة  
الفاشية واحد.. اتنين.. ثلاثةةةةةةةةةةةةةةةةةةةة!!!"

أحلام:

"يخرب بيت كابوس وعزومة كابوسسسسسسسسس!!!"

\*\*\*\*\*

الكتاب

الكتاب



أنا منحوس أنا اتعلقت فانوس

الكتاب

كابوس:

(بيكلم نفسه في سره رغم إن صوته عالي)

"النهاردة يوم جميل.. النهاردة يوم ميلادي الجميل.. يا ترى يا أحلام جبتي لي هدية إيه النهاردة؟؟ أكيد جبتي لي الهدية اللي طول عمري نفسي فيها.. سكوتر بالكهرباء، وممكن يشتغل بالجاز لو مفيش غاز، وممكن أوصله وأشبكه في البك بك عشان تبقى سكوتر البك بك"

"حبيبتى انتي سمعتي حاجة؟؟"

أحلام:

"لا ماسمعتش حاجة عن سكوتر البك بك ماتقلقش"

كابوس:

"طيب الحمد لله إنك ماسمعتيش"

أحلام:

(بتفكر)

"أنا فعلا عايزة أجييله هدية.. بس أنا عايزة أجييله هدية أنا بحبها.. هو مين يعني اللي بيحبيب هدية أنا ولا هو ----!!!؟ يروح هو يحبيب لنفسه السكوتر ده.. هو طمعان فيه عشان

أيام ما كان قزم صغير ماكانش لسه اخترعوه ولا صدروه ولا أنتجوه ولا استوردوه، فهو حاطط عينه على سكوتر (القزم سريع ابن سريعة بياعة الفجل) طيب هي واحدة كسيبة عرفت تجيبه من مكسب الفجل وأرباحه أنا بقى أجيبهوله إزاي؟! خلاص أنا حروح عند محل الخردواتي أشوف عنده هدية مناسبة لكابوس وأكيد حلاقيه حته خردة ترم عظمه"

عم خردة الخردواتي:

"صباح الخردة يا خردة"

أحلام:

"إيه يا عم خردة انت مش حتبطل شقاوة؟! حتفضل طول عمرك عقلك خردة ولسانك خردة!?"

عم خردة:

"بتدوري على حاجة؟؟ شكلك مزنوقة في هدية"

أحلام:

"فعلا مزنوقة أوي"

عم خردة:

"مهو انتم كده مابتجوش عندي غير لما تتدبسوا في هدية"

وتستخسروا تدفعوا فتجولي"

أحلام:

"كفاية رغي يا عم خردة أصلي مستعجلة.. ما عندكش حاجة  
كده تنفع هدية للمتجوزين"

عم خردة:

"جيتي في وقتك.. لسة واصلني من بلاد السند حتة خردة  
عجب"

أحلام:

"وريني كده ---- ده شكلها غريب شوية ومصدية"

عم خردة:

"على طول مستعجلة على رزقك! ده فانوس سحري من أيام  
الزمن السحري لما كان السحرة مابيش تغلوش وعندهم بطالة،  
فراح واحد حكيم مصنع الفانوس المصدي ده من علبة السمنة  
اللي خلصتها مراته، وحط جواه كل أسرار الحكمة وقفله كويس  
ودفنه في دولا ب المطبخ اللي تحت الأرض مع خزين البيت، ولما  
السحرة عرفوا بالحكاية هجموا على الحكيم وموتوه هو ومراته  
وطبخوه جوه الفرن على أساس إن الحكيم نفسه هو اللي  
فانوس سحري وجوة دماغه الأسرار والحكمة. ومرت سنين  
طويلة لغاية لما اتنين شباب من القرن اللي احنا فيه اتجوزوا

جديد وأخذوا الشقة مفروشة، فجت المدام تفتح دولاب المطبخ  
اللي تحت الأرض لقت علبة السمينة المصدية فقرفت --  
وراحت ادتها لجوزها فقرفت --- فراح اداها لحماته هديه  
فقرفت --- فراح ادتها للخردواتي اللي على ناصية بيتهم  
فقرفت برده --- وراح بعتهالي مع البضاعة اللي بستوردها من  
عنده.

أحلام:

"يا سلام! والمفروض إن أنا ماقرفش ولا إيه!!؟"

عم خردة:

"يا بنتي أنا زي أبوكي.. خدي بنصحتي.. دي أحلى هدية ممكن  
تديها لجوزك يمكن يقرف ويطلقك وتخلصي"

أحلام:

"فعلا عندك حق.. طيب عايز كام؟؟"

عم خردة:

"مش عايز غير إنك تاخديها بالسلامة من هنا وترحميني من  
القرف اللي أنا حاسس بيه"

(ومشيت أحلام في حال سبيلها شايلة علبة السمينة المصدية)



وكمآن لابسة مريلة المطبخ!؟ يعني إيه!؟"

المارد الست:

"كلاييت تاني مرة.. شبيكي - شبيكي - سمتك بين إيديكي"

"خلاصة الحكمة وفن الطبخ السندي القديم"

أحلام:

"سندي وهندي مين مش فاهمة!؟"

المارد الست:

"ليكي ثلاث وصفات لأشهى الأكلات، وعليهم وصفة هدية  
عشان انتي حررتيني من ابن المؤذية حكيم الغبرة اللي كان  
حابسني جوة علبة السمنة.. انتي عارفة أنا مين!؟"

أحلام:

"مين ياختي!؟"

المارد الست:

"أنا كنت مراته في الحياة السابقة، وطليقته في الحياة اللاحقة،  
وأرملته في الحياة القادمة اهئ اهئ اهئ.. حبسني منه الله في  
علبة السمنة عقابا ليا عشان جبته كوليسترون في القولون،  
فكانت دي هديته ليا في عيد ميلادي، وقالني مفيش غير صفيحة



السمنة اللي تحبس شرك وشر أكلاتك ووصفاتك عن العالم كله.  
ومن ساعتها وأنا نادرة ندر جوة الصفيحة إن اللي حيفتحها  
ويحررني عشان أطلع في برامج التوك شو أوصف وصفتي  
وأشتهر، حديله أسرار ثلاث وصفات وعليهم واحدة هدية.  
وانتي اللي طلع عليكي العين.. كل القرون اللي فاتت ولا جيل  
ساعدني فيهم ----- والله مانا فاكرة مابعدش أصلي.. المهم كانوا  
بيقرفوا من الصفيحة يفتحوها.. بس انتي اللي أنقذتيني وكتر  
خيرك نشنتي صح؛ في عصر التكنولوجيا والإنترنت والأفابوك..  
عشان يبقى انتظاري ليه فايده"

أحلام:

(بتهرتل)

"لا لا كثير عليا! إيه النحس ده؟! كنتي فين يوم العزومة؟!  
جيالي دلوقت وأنا مستنية أجيب هدية لكابوس؟! هو أنا  
ناقصة نحس؟! لا وكمان مارد ست مضطهدة من القرن اللي  
فات، ومطلوبة في القضاء المستعجل عشان انتشار مرض  
الكوليسترون!؟"

"أنا خلاص قررت.. أنا حعتقك وأحررك بس بشرط.. حخليكي  
عندي رهن تغسلي وتكوي وتكنسي وتمسحي، وبالمرّة تطبخي  
لحماتي وكابوس عشان أخلص منهم، لغاية لما أشوف حعمل  
معايي إيه.. عامة عقد العمل سنتين، وليكي شهر تسافري فيه  
السند تشوفي أحفاد أحفاد أحفادك وترجعي ثاني

بالسلامة.. وطبعاً حتوفريلنا تذاكر الطيران عبر الزمن عشان  
انتي مارد ست، وبعد سنتين أفكر أشوف حعمل معايي إيه..  
ممكن أنقل كفالتك"

### الموارد الست:

نعم يا ختي؟! دانا من حارة عجب الي في بلاد السند.. هو إيه؟! افتكرتيني الشغالة السندية الي جابهالك جوزك؟! غسل وكنس ومسح وطبخ إيه هو أنا أخلص من حكيم الغبرة تطلعلي أحلام الطويل؟! هو انتي طليقي مسلطك عليا ولا إيه؟! تعالي هنا دانا الي حوريكي!"

"انتي أصلك منحوس ----- وحعلقك فانوس  
لكابوس واشتاتاشوت!!!!!!!!!!!!!!  
انتي بقيتي فانوس!!!!!!!!!!!!!!!!!!!!!!!!!!!!!"

\*\*\*\*\*

الكتاب

الكتاب

ابني ماي مان وانت ماي موني

الكتاب

أحلام:

"مش معقول كده كل يوم أبداً يومي ملاقيش في دولاب المطبخ  
نسمافيه!! دماغي حتفرقع على مراحل عايزة أظبط الهاشاج  
بتاع الدماغ عشان يشتغل.. أجرب كده أطلب دليفرن"

التليفون:

"ألو أيون معاكي خدمة التليفون الآلي --- طلباتك إيه؟؟"

أحلام:

"عايزة واحد نسمافيه دبل ملح زيادة"

التليفون:

"وإيه كمان؟؟"

أحلام:

"بس كده"

التليفون:

"لا ماينفعش.. لازم الطلب يكون خمس طلبات عشان نفيد  
ونستفيد"

أحلام:

"خلاص مش عايزة حاجة منكم.. كنسليشن"

التليفون:

"أكسبتيشن كنسليشن ----توت ----توت ----توت ----  
-أوردرد يفوت والكل يموت ----"

أحلام:

"أعمل إيه دلوقت؟! أقلب في الدولار يمكن ألاقي"

(بعد ثلاث ساعات من البحث تحت السرير وتحت البوتاجاز  
والثلاجة)

أحلام:

"خلاص أنا ممكن أشرب من كيعاني!"

(جرس الباب بيدق)

أحلام:

"مين؟؟"

(فتحت الباب)



"أهلا وسهلا من البرتقانة الطخينة اللي لابسة شوال أخضر  
ساتان يجنن حياكل من السلم حته ---- من (مرتاحة تعبان  
مظلوم)"

"إزيك يا مرتاحة.. ماعرفتكيش من كتر ما اتدورقي واخضرיתי"

مرتاحة:

"لقيتك مش بتسألني على أصحابك من الجامعة قلت أجيلك  
أطب عليك وقت غداء"

أحلام:

"وانتي الصادقة وقت النسمافيه"

مرتاحة:

"معقولة! انتي لسة حتى مافطرتيش!?"

أحلام:

"الحقيقة لأ"

مرتاحة:

"طيب مش ناوية تتغدي!?"

أحلام:

"الحقيقة لا"

مرتاحة:

"أمال أنا جاية أزورك ليه؟! (كلام في سرها)

أحلام:

"سمعتك على فكرة"

مرتاحة:

"طول عمرك سمعك تقيل مايخفش غير على صوتي"

"طيب ياختي مادام مفيش ضيافة آخذ بعضي وأمشي--- ولا

أقلك أقعد معاكي في الضلة جوة الشقة لغاية لما الواد (مجني)  
يخلص قمرين الكورة في الشارع السد اللي تحت بيتك ----  
أحسن أنا سمعت إن المضرب اللي هنا عامل فريق ريلات  
مدري إيه.. أحسن فريق في المنطقة"

أحلام:

(في سرها) "يا بنت الإيه! أتايريكي جايا لي عشان مصلحتك!"

"تنوريني يا حبيبتي ---- بس إيه الكيس اللي في إيدك ده؟?"

مرتاحة:

"ده تموين الجمعية.. أصلي استلمت البطاقة وقلت ألحق

أصرف التموين بتاعي وبتاع حماقي واختي و بنت خالتي وجوز  
أمي ومرات أبويا يعني؛ مانا أصلي متفقة معاهم آخذ منهم  
بطايق التموين، أجيّب التموين بدلهم. وآخذ من كل حد  
نصيبى.. مرة آخذ كيس شاي ومرة كيس نسمافيه ومرة كيس  
رز بسمّة المستورد ----- يعني أهو كله بثوابه"

أحلام:

"بس أنا أعرف إنك مرتاحة ماديا وجوزك مش محتاج -----  
----- انتي بتعملي إيه بمصروف البيت مادام التموين  
بتاخذيه مجانا بتاعك وبتاع غيرك؟"

مرتاحة:

"لا مانا محوشاهم عند البوسطجي؛ عشان بعد ما أطلع معاش  
أحط عليهم المعاش والمكافأة ويكون جوزي مات وأورثه ويبقى  
المبلغ كبر وأبدأ حياتي من جديد"

أحلام:

"تبدئي حياتك بعد المعاش؟! وافرضي جوزك عاش؟"

مرتاحة:

"ساعتها حوديه الإنعاش، ويا ريت يوريني إن عاش"





الكتاب

حبيب زمان عثمان

الكتاب





تيزا العجوزة:

"مستعجل على إيه يا بوسي؟! الأيام بتجري فورية بكرة تفتكر  
الأيام دي وتتمناها ترجع ثاني"

كابوس الصغير:

"بوسي؟! بوسي إيدي يعني؟! ده حتى اسم غلس يعني يا تيزا  
مش عارفة حتى تفتكري اسمي بتناديني باسم جدي اللي ياما  
باس إيدك عشان يرضيكي وتسامحيه وينام!?"

تيزا العجوزة:

"بتألس عليا عشان ست كبيرة؟! بكرة تكبر ونشوف حتعمل إيه  
يا سي بوسي - يا ريتك حتى تطلع في نص غباوة جدك قبل ما  
يتقتل"

<فلاش للأمام والحاضر>

(رجع ثاني كابوس للوقت الحالي)

انجكشن:

"إيه رأيك في مشروب الطاقة الجديدة؟؟ ظبطلك الجوانح ولا  
لسة؟؟"

كابوس:

"ياه ه ه ه ه ه ه! ده مشروب عجيب بجد خلاني أروح

زمان وأرجع تاني.. إزاي يعنى!؟

### انجکشن:

“لأذا انت ماجربتش حاجة أصلا.. لسة لما حتجرب النوع الثاني منه.. عجيب بجد عجيب.. ياخذك يوديك المستقبل وترجع تاني”

کابوس:

"انت بتكلم بجد ولا بتهرق وبتتريق!؟"

### انجکشن:

"طبعاً بتكلم جد.. بس كله بثمناه.. ده مشروب مستورد ممنوع من السوق عشان بيعلي الدماغ لفوق أو ينزلها لتحت، وانت عارف لازم الدماغ تفضل صاحبة عشان حظر التفكير والتأمل في الماضي عشان مانتعلمش من أخطائه.. لازم نفضل نغلط على طول ومانقابلش الناس الكبيرة بتوع زمان عشان يعلمونا حكمهم"

کابوس:

[illegible]





كابوس:

"نفس الرد بتاع الولاية أحلام.. افتحي أنا جدك الحاج كابوس"

الحفيدة أحلام:

"إيه ده معقولة أبويا الحاج كابوس الكبير!!؟"

كابوس:

"انتي عرفتي إزاي!!؟"

الحفيدة أحلام:

"أولا شعرك كله أبيض، وظهرك عنده أتب، وجلدك سايح من على عظمك.. أكيد انت أبويا الحاج كابوس اللي مستنياه من امبارح!"

كابوس:

"حاجة غريبة! أنا عجزت إزاي!!؟ وانتي عرفتي إزاي!!؟"

ومستنياني ازاي!!؟"

الحفيدة أحلام:

"مهو أصل العرافة (أرافة) قالتلي امبارح لما قرت لي قعر الحلة المدهنة (ترقبى وصول جدك الحاج عبر بوابة زمن الحارة.. هو

الوحيد اللي حيهدي سرك يا محتارة)"

كابوس:

"مين؟! ---- إيه!!؟"

"دانا جاي عايز أتعلم منك ومن كابوس حفيدي --- انتي إزاي  
شبه جدتك أحلام؟!"

أحلام الحفيدة:

"أنا المستنسخة أحلام من نسل الطويل، وكل اللي هنا  
مستنسخين نسخ طبق الأصل من الأجداد.. عقل وجسم وشكل  
وتفكير وذكاء أو غباء"

كابوس:

"مستنسخين يعني إيه؟! دانا جاي أتعلم منكم ومن المستقبل  
أعمل إيه في حياتي!!"

أحلام الحفيدة:

"تتعلم مننا إيه دانا مستنياك بفارغ الصبر عايزاك تقولي أشغل

جهاز الآي باد السحري ده إزاي؛ عشان بدور على عريس بقالي  
عشر سنين وحموت وأتجوز كابوس الحفيد فالعرافة (أرافة)  
قالتلي إن انت جاي وحتقولي أعمل إيه بالظبط زي ما عملت  
جدي أحلام معاك عشان تدبسك في الجواز"





الكتاب

الكتاب

"انسانی بس خد عنوانی"

الكتاب



حيدققوا معانا في أشكالنا ولا حيبصبصوا برة. دول بيقولوا إن رجالة المريخ إيه إيه.. صواريخ ياختي منك ليها.. حاجة كده تجنن.. وإن ماعندهمش ستات خالص في كوكب المريخ، وإنهم من زمان فتحوا باب الترحال بين الكواكب للبحث عن الستات"

آنسة عانس:

"الله يطمنك يا حبيبتي.. دانا خلاص كنت حطق من جناي أكثر ما هما طاقين، وفكرت كثير أعمل رجيم لما أطخن يادوبك شهر ويجيلي سل ونحافة، شهر ثاني أديها غذاء ملكات الدبابير أرجع أفشول ثاني.. وكل شهر شكلي يتغير، تلاقي عندي مقاسات في الدولاب - دولاب إكس نحيف للتنحيف، ودولاب إكس سمين للتسمين.... الشهر اللي أكون فيه نحيفة يفتكروني تحت سن وحجم الجواز فالعرسان تطفش. والشهر اللي أكون فيه سمينة يفتكروني فوق سن وحجم الجواز فالعرسان بردو تطفش، لما خلاص اتعودت على نفسي وحيدة اهْيْ اهْيْ اهْيْ"

أحلام:

"لازم يكون عندك ثقة في نفسك يا عانس، وتنسي خالص إنك عانس.. لازم نغير اسمك وكلنا نناديكي باسم (مدام).. إيه رأيكم يا ستات؟؟ موافقة؟؟"

صوت جماعي:

"موافقة!"

"مدام ----- مدام ----- مدام ----- مدام ----- مدام"

آنسة عانس:

"كتر خيركم كلکم.. وأنا من هنا ورايح حشوف نفسي مدام مش

عانس ومش وحيدة.. أكيد النحس حيتفك"

(ومرت الأيام والشهور، والآنسة عانس أقصد الآنسة مدام زي ماهي، شهر نحيفة وشهر سمينه، وكله بيناديها يا مدام يا مدام يا مدام، ومع ذلك مفيش ولا عريس أصلا فكر حتى يتقدم أو يسأل عنها عشان حتى ياخذ وقته ويطفش"

آنسة مدام:

"إيه النحس ده!؟"

أحلام:

"مالك يا مدام؟؟"

آنسة مدام:

"ما تجيبيش على لسانك الاسم ده تاني أنا كرهته!!"

أحلام:

"ليه قلقيتيني!!؟؟"

آنسة مدام:

"اتعرفت على واحد على الأفا بوك وكان سعيد أوي بيا وبعتله صورتين ليه مرة وأنا نحيفة ومرة وأنا سمينه، ولقيته مبسوط

أوي وبيقولي إني زي القمر وإني فعلا مدام أحلامه

قلت (ماشي)

قالي إنه متجوز وعنده عشر عفاريت صغيرين وأمه وأبوه  
عايشين معاه في نفس الحوش.

قلت (ماشي نمشيها زوجة ثانية)

قالي إنه متجوز ثانية وتالتة في نفس البيت.

قلت (ماشي نمشيها رابعة وأهو نبعد عن حياة العزوبية)

قالي إن مراته بيصرفوا عليه، واحدة بتشتغل شغالة، والثانية  
شغالة، والثالثة شغالة.

قلت (مش مشكلة مانا كمان شغالة موظفة وكسيية وأهو  
أكسب ثواب في عيلته الغلبانة وأصرف زكاة مال عليهم)

قالي خليها عرفي عشان مانقعش في الحرام ويبقى معانا ورقة.

قلت (ماشي وماله عرف الديك أهو أحسن من كلمة عانس)

قالي ولا نخليها مسيار على الأمور ما تتيسر.

قلت (وماله أهو عندي أوضة فاضية وسرير فاضي جمب مرات  
عمي، وأهو كله بثواب المسيار زي ما مسيرنا حاله وفرجنا  
كربه) بس يبجي بعد كده وبيقولي (يا مدام اوعي جوزك ياخذ





الكتاب

حلاوة المتجوز وهو متجهز

الكتاب

كابوس:

"إيه الريحه الحلوة دي اللي في البيت النهاردة؟! خير هو فيه  
طهور في البيت اللي جمبنا ولا فيه جنازة في البدروم اللي  
تحتنا؟!"

أحلام:

"انت دايما كلامك محبط كده؟! يعني هي الروايح مابتطلعش  
ولا بتتشم غير في المناسبات السعيدة طهور أو جنازة؟!"

كابوس:

"مانا أعملك إيه؟! احنا اتعودنا دايما نشم الحلويات في الداخلة  
والخارجة"

أحلام:

"لأ اسمحلي.. أنا يوم فرحنا على السطوح كانت ريحتي حلوة،  
وكنت باخة كام بخة بيروسول في شعري، ولا انت ناسي  
أفكر؟"

كابوس:

"فعلا دانا بقيت بنسى ولا إيه؟! يقطع مشروب الطاقة واللي  
بيشربه!"

"من ساعة ما سافرت لورا ولقدام وأنا عقلي خلاص جرج في

مكان مهجور --- سامحيني يا بيرسولة حياقي --- بس قوليلي..  
أخبار جلابية النشر إيه؟؟ هي فعلا لسة عندك؟؟"

أحلام:

"طبعاً عندي.. انت عرفت إزاي يا خبيث!!؟ شكلك كده  
بتراقبني كل يوم.. كنت عارفة إنك بتحبني وبتخبني"

كابوس:

"براقبك إيه بس!؟" (في سره)

"طبعاً طبعاً براقبك من كتر حبي ليكي - بس عندي طلب.. يا  
ريتك تشحيتها الجلابية دي.. ممكن نشترى واحدة تانية غيرها"

أحلام:

"لأ ماقدرش.. دي مع الشوار يا كابوس ماينفعش أفرط فيها..  
دي بتتوارثها الأجيال في عيلتنا"

كابوس:

"آه مانا عارف انتي حتقوليلي!؟ طبعاً تتوارثها وتنشر بيها كل  
الأجيال اللي جاية كمان انتي حتقوليلي!؟"

أحلام:

"الجلابية دي صلاحيتها بتنتهي في حالة واحدة بس"

كابوس:

"يا ترى امتي؟؟؟"

أحلام:

"لو واحدة من الأجيال انتحرت أو ماتت أو اترمت وهي بتنشر بيها بس.. دي الحالة الوحيدة اللي لازم تتدفن بيها.. وتبدأ الأجيال اللي بعدها بجلابية جديدة للنشر"

كابوس:

"والحادثة الجميلة دي حصلت كام مرة في تاريخ عيلتك يا أحلام؟"

أحلام:

"الحقيقة احنا عيلة محظوظة.. من أيام تيزا أحلام السادس عشر آمون حتشبسوت ومفيش حد بي موت وهو لابسها"

كابوس:

"قلتيلي.. أتاري ريحتها مميزة تتشم من أول الحارة! حتى شكلها والرسومات اللي عليها تحسي إنها طلاس فرعونية!"

أحلام:

"فعلا انت عرفت إزاي؟! دي طلاس سحرية كلها أسرار فرعونية.. انت فاكرك إنك اتجوزت واحدة عادية؟! دانا بنت





الملك  
الملك

الكتاب

قبل ما تتوحش وترزينا بتوحد --- تعال عندنا

الكتاب

منشور مهم انتشر على كل المناشر إن فيه كوكب فتح جديد وإنه فتح العضوية النص دائمة لسكان كوكب الأرضية. وطبعا الكل من الفرحة وما نفسه من نفس البلكونة اللي كان منشور عليها الإعلان، والحببة اللي عاشوا من الانتحار الجماعي ده فضله يطيروا ورا بعض عشان يلحقوا يقفوا في المطب اللي حيتبني عليه سفرة الكوكب الجديد، وطبعا الموافقة على الطلب حتكون بأسبقية الانتظار فوق المطب على ما الأرض تتمهد ويتحط الأساس، ويشيل فقيه قوالب الطوب المغشوشة بالكياس، وساعتها تنتصب السفرة، واللي يقدر يقعد على كرسي رجله مكسورة أو يعيش بعد ما تقع عليه طوبة مغشوشة بالكياس يبقى فعلا الحظ لعب معاه أحلى لعبة لأنه بكده أثبت إنه من السلالة الصامدة اللي ليها الأولوية في الحصول على العضوية، وحشرات من بعده تتمتع بنفس مزايا العضوية، وقمرينات مجانا، وبطولات مجانا، وشهرة مجانا، وكل حاجة مجانا ----- يا بختك يا مجانا ده حتى ليه الحق إنه يخلف مجانا ولو معرفش هما يخلفوله مجانا أي عدد من الحشرات؛ لأن طبعا الكوكب الجديد عايز يتملي، ومحتاج السلالات الأصلية.

والعضوية دي تضمن لحاملها رحلات سفاري، وشحن وتفريغ وتفريغ في حياته الموازية كمان، يعني كل المزايا في ميزة واحدة إنه يكون من أوائل الأعضاء. وكان شعار الكوكب الجديد (قبل ما تتوحش وترزينا بتوحد --- تعال عندنا)

